

舊經濟與新經濟

——

雲煙過眼錄續集

湯允謨 著

中華書局

叢書集成初編

雲煙過眼錄（及其他一種）

中華書局出版發行

（北京王府井大街三十六號）

秦皇島市資料印刷廠印刷

一九八五年北京新一版

開本：七八七乘一〇九二毫米三十二分之一

統一書號：一七〇一八·一五一

叢書集成初編所選寶顏堂秘笈奇晉齋叢書十萬卷樓叢書皆收有此書寶顏本刪節不完奇晉本據抄本刊刻多誤字惟十萬卷樓本較爲完善故據以排印

雲煙過眼錄續集

元 逢澤湯允謨仲謀著

總管太中澤陽趙伯昂仁舉所藏器

羊鐙一內有款曰南宮羊鐙

古伯彝蓋一色青綠花瑩可愛上有把鈕爲人盜去

又有兩鼎內有款識字尤多在底下甚佳

玉馬一高五寸有奇雕琢極精作嘶鳴狀如生玉色溫美古玉色如此樣有十餘枚或大或小或有文或無文或青或綠長不滿寸蓋人綰繩之物

玉人一高五六寸束髮於頂餘髮被腦後衣垂至地不見足色溫潤與馬同人如顧愷之所畫列女圖中人物

子母蟠螭玉鈎環徑六寸螭身白頭紅子亦紅走母腹上作相視之狀宛然如生紅如荔枝白如酥製作精巧通前人馬爲諸玉之冠

楊庭光下生如來像思陵題乾卦印如來衣朱衣坐圓光內
王右軍司州帖古黃紙書金章宗泥金書簽明昌七印全

又屏風帖硬黃紙書徽宗泥金題簽首尾天水宣政內府圖書等印並全。

吳元瑜瑤池圖二卷一作王母冠玉冠乘金車駕二龍前後女從各執旌節導引攀龍撫鸞者亦二髮髻女童甚奇卷尾作大池卽瑤池也一作穆王坐金殿據金椅而王母與一義冠婦人鼎峙而坐彼云右坐者上元夫人也畫極精緻而有院體前後政和七印佑陵題宣和畫譜云三卷今止二卷。

吳元瑜梅竹雪雀圖有明昌七印。

西域貝葉一片長二尺餘高只二寸半卽今西番字葉色如蒲裏經細竹片二片內有識字云大蜀皇帝賜撫州溥山院今世畫上作羅漢誦貝葉經像多作手持樹葉甚謬可笑。

古墨

潘衡墨一已斷上有潘衡二字約重四兩背有金填篆書墨成不敢用進上蓬萊宮。

宣和雙龍一笏裕陵書八字云政和丙申宣和睿製。

俞林一笏題順慶殿殿名未審當再考。

劉士元一笏題云緝熙殿乙未星砂。

胡光烈黑犀一笏。

郭忠恕鏡湖方氏一笏劉文通一笏。

郭玘一笏上題緝熙殿。

宣和天水雙龍印。有方圓二樣。法書用圓。名畫用方。宣和明昌二帝題簽。法書用墨。名畫用泥金。

明昌七印。其一曰內府葫蘆印。其二曰羣玉祕珍。其三曰明昌珍玩。其四曰明昌御覽。其五曰御府寶繪。其六曰明昌中祕。其七曰明昌御府。

祝君祥永昌收

趙千里釋迦佛像。一下有細字云。臣伯駒奉聖旨畫。其像廣目深眉。螺髮大耳。耳垂二大金鑲。螺髯而虬鬚。頂有肉髻。左眉放光一道。衣紋腹腿隱隱可見。筆法極佳。宛然西域一胡僧。

端硯一。背有墨紋者。皆成細花。面有鐫篆字兩行云。王次張漢老。水坑下巖。子子孫孫。其永寶用。沼貯水不涸。同其樣如此。王次張高宗紹興中爲肇慶通判。此硯乃賈秋壑物也。

山居太史楊瑀所藏

古玉天祿。長一尺餘。背起一竅。身皆水銀。古如虎斑文。爪牙製作極精巧。

銅虎符一。全體具存。背上篆云。某處發兵待行。腹下分書十干。唯戊癸二字合全。餘八字皆平。腹內作牝牡五竅。關合之則一全虎也。往往有漢虎符者。楮雪巖及吾貞白所收皆如是。符牌樣上鑄一小虎形。下云某處發兵。或左右。或止有一邊。今此全虎形亦異矣。

竹龜一。乃一老竹片製。首尾四足。皆他竹外來者。竅小兩頭倍大。可轉動而不可出。故用縱橫之竹。紋理

顯然背上負三接碑牌一面。兩側有轉動者。亦是外來之竹。首大腰細。不知何法得入。雖巧於製作。亦罔測之。或云鬼工也。

奇石子一。色青而質粗。大如鷲卵。形差匾。上有兜塵觀音像。天然如畫。或加磨洗。精神愈見。又瓊漿石漿。水瑪瑙也。二寸許。乃塊石耳。觀之則滴水在內。搖之則上下流動。古玉畫也。圖畫志云。張文懿公某有玉畫。或疑其故物云。

智永石刻千文。九成宮石刻。皆金士孫所植。

余見施家有一手卷。錦表首。漢王元昌羸馬圖。上寫廣德一作政元年七月。奉旨檢入。漢王元昌畫。臣嚴款之。臣陳淨心進上。有龍鳳印。紹興印。乾卦七印。餘一印不分曉。

鮮于伯機有震雷琴。是許旌陽手植桐作琴。背旌陽印。劍之跡宛然。

又有黃素黃庭經。飄飄有仙氣。有楊玄靖。許穆之印。陶穀。米芾跋。

余見某家藏宋徽宗御筆作一胡鷹。紅綠皮圈足。前有一馬缺足。栗殼色。甚奇特。

又有滕王雙蝶穿花。上有一押印。亦真跡也。

東坡竹。

昔漁者于江邊見雷公逐一小黃蛇。擊殺之。化爲劍。背有八字。許旌陽斬蛟第三劍。蓋至寶也。今在張伯雨家。

趙雍家有閭立本作十八學士圖于中虞世南房玄齡最佳。

余家舊藏林邑進鸚鵡圖蓋唐貞觀時經進太宗以其思歸并二女皆放之放之一作送還國乃閭立本真跡也。

楊元誠家所藏

唐王建親書宮體小詩一百二十首蓋宮詞也極其宛轉妖麗今人罕能及後有錢武肅王印圖押龍蓋宣和內府物也其字皆章草。

余見薛玄卿示以銅雀香鼎一兩耳有二龍交蟠宛轉目各有珠能轉又取不出蓋紹興古物亦希世之寶也。

靳公子家所藏

錦川石長五丈餘蓋宣和後宰門所謂艮岳前河梁也石色紫碧相間皆成文理近世罕得今藏戚順王家。

余家舊藏司馬文正公手錄富鄭公使北日抄一卷其長五尺大字書雖若古拙而首尾端書如一豈像其平生行止耶史稱公之至誠可以動天地此卷見之丞相益國公周必大子充爲之跋賈師憲物也并陽老人所著雲煙過眼錄中附葉森文璧二氏所見與湯允謨續錄數頁非盡周公之書也世所傳抄與刻本皆譌舛不可讀此爲張青甫所校猶有未盡余復重加考正然其中錯亂無序者尙多。

聊且錄出以備遺忘。戊午三月廿二日。京師橫街。時余病口糜。食粥一月矣。林村題。